

AFBW TA EKSIGÍ KLARIDAT DI MARIADAL

Edson Frans ganadó Festival Kanto Krioyo 2025



Edson Frans a sala e ganadó absoluto di Festival Kanto Krioyo 2025. Ku e komposishon Di Se Juwa te Paden, Frans a sa di bai ku e premio mayó. E aña aki Festival Kanto Krioyo sigur tabata kargá ku emoshon na momentu a para ketu na pèrdida di Pandjua.

CHANGAN

HUNTER

[f /dabboussimotors](#)

Live FM 99

HAIR BARBERSHOP

Hanchi lenks
pabou di
Gas Ekspress

Habri 5 dia!
Tel: +599
788-2228 /
+5999 529-
2228

[f hair cut](#)
[www.hairbarbershop.com](#)

**PA TUR BO
PIESA I TIRE
PA BO AUTO,
BUS OF TRUCK**

NAPA

KAYA CARLOS A. NICOLAAS | 717-6272

\$10 FREE SLOT PLAY

Sign up for your **FREE Player's Card**
and receive \$10 in **FREE Slot Play!**

Open Monday - Saturday 8am to 4am | Sunday 7pm to 3am | (599) 717-3504
[diviflamingocasino.com](#) | ATM available

DIVI FLAMINGO CASINO

xerox

**OBERSI
ELECTRONICS
BONAIRE**

**ABVO ainda no ta kla
pa afiliá na USIBO**

PAG#2

Apesar ku tin mas union:

ABVO ainda no ta kla pa afiliá na USIBO

KRALENDIJK- Na e momentu aki 6 sindikato ta trahando den union pa organisá selebrashon di Dia di Obrero. Ta trata di sindikatonan ABVO, AFBW, FEDEBON, StrAF, SiMaBo i NAPB BES. Mirando e union aki, e pregunta ta surgi si ABVO awor ta dispuesto pa restourá e kiebro entre e sindikato i Union Sindikal Boneriano (USIBO). Tafila Janga, kende ta presidente di ABVO ta ekspresá su posishon kla den e asunto aki. “Mirando ku ami na mando ta bai selebrá e Dia di Obrero

ku e otro sindikatonan, esei no ta nifiká ku outomátikamente mi ta bai drenta USIBO bèk”, Janga ta enfatisá.

Algun tempu pasá ABVO a distansiá su mes for di USIBO. No ta bon kla kiko presisamente a tuma lugá pa asina e sindikato kita for di USIBO. Sí, esaki a sosede durante un periodo di basta tenshon entre ABVO i Federashon General di Trahadónan di Boneiru (AFBW). ABVO semper a tilda AFBW di ta yag riba su miembronan. AFBW na su turno tabata akusá ABVO di no ta

sali na vanguardia di su miembronan i ta ‘drumi’ ku e dunadó di trabou. Ainda ta fresku den memoria tur e tenshon i konflikto ku a eskalá na momentu e trahadónan di Selibon a bandoná ABVO i a afiliá na AFBW. Janga opviamente no ta kla pa djis lubidá tur kos i hasi manera nada a pasa. Janga: “Mi tin ku bai bèk den mi seno pa mi sa kiko a pasa, pa nos tuma un desishon pa nos wak kon nos ta bai sigui. Sí nos ta bai bèk òf den ki forma nos ta bai bèk pa evitá ku e fayó ku a surgi e tempu aya ta bolbe surgi

aworakí.” Un eventual afiliashon por lo pronto no ta tuma lugá. “Esei nos ta parker un ratu.

Laga nos kaba ku Dia di Obrero i despues nos ta atendé esei”, Janga ta bisa.



Tafila Janga ku ta splika ainda ABVO no ta kla pa bolbe bou di paraplü di USIBO

Yudansa ku deklarashon di inkomstenbelasting 2024

Belastingdienst CN den kolaborashon ku Kamara di Komersio ta brinda e oportunidat pa yudá bo ku yenamentu di bo deklarashon online, grátis. Pasa ku bo lèptòp, tablèt, òf telefòn selular i bo ta risibí asistensia, di manera ku abo mes por hasi bo deklarashon online.

Fecha: 5, 6, 12 i 13 di mei 2025

Orario: 3'or di atardi pa 7'or di anochi

Sitio: Kamara di Komersio
Kaya Amsterdam 23

Nos ta warda bo!



N
E

Lesadó, bo sa ku humildat no ta nifiká ku bo no mes-ter tin konfiansa propio? Straño, pero tin hende ta pensa ku humildat ta enserá esei. Ayera nochi mi tabata na telefòn ku un konosí di mi, un Kristian ferviente. Bon mirá, e ke konvensé mi pa guia un grupo di hende muhé pe. Awèl, den komb-ersashon mi a bis'é kon ami ta mira mi mes.

Nada perfekto pero sí un muhé inteligente, pashoná i bunita. I ku ta hasi es-fuerzo pa mantené esaki. T'asina mi ta mira mi mes. El a kòrda mi ku Dios no gusta arogansia, E stima humildat. Kon por ta arogansia lokual hustamente ta Dios a duna mi? E humildat ta sinta den e realisashon ku no ta riba propio forsa, sino pa grasia di Dios mi por stima mi mes.

No ta algu inkomun, ku hendenan ta bisa mi ku mi tin un bon kasá. Hende ku no konosé mi bon, djis ta haña ku nan por mensioná esaki na mi. Ainda mi ta kòrda 14 aña pasá nos tabata na aeropuerto Hato wardando pa bolbe Boneiru. Un señora hende grandi di Rincon a bisa mi: "Bo tin un klòmpi oro den bo man. Kuid'é bon." El a referí na mi kasá. E señora aki, su alma sosegá na pas, tabata konosé mi kas. Despues di esei durante añanan di nos matrimonio mi a keda topa hendenan ku ta bisa mi kon bon kasá mi tin.

No komprondé mi robes, ta un bèrdat ku mi tin un bon kasa pero na mesun un momentu mi ta un bon pareha pe. E ta keda interesante pa skucha e hendenan ku ta asumí ku djis mi tin suerte pa motibu ku mi ta kasa kuné. Mi ta kasá ku un hòmbler atento, kla pa yuda tur ku bati na su porta. Un tremendo yu i tata.

Awor lesadó, bo ta kere ta pòrnada e hòmbler aki ta asina? Bo no ta pensa ku ami tambe mester ta bon pe? Di traha un kop'i kòfi mainta te kuid'e ora e ta malu. No papia mes di sobra abilidad komo un bon esposa. Mihó mi stòp di skirbi, sino e kos aki ta bira kompletamente otro tipo di kolumna.

AFBW TA EKSIGÍ KLARIDAT DI MARIADAL

K R A L E N D I J K - Sindikato AFBW no ta kontentu ku e sistema ku Fundashon Mariadal (FM) ta atendé ku e intenshon pa pasa su trahadónan pa BonLab. Awor e sindikato ta eksigí transparensia di inmediato di FM. Esaki BONERIANO a komprondé di fuentenan ligá na e sindikato.

R e s i e n t e m e n t e BONERIANO a publiká un artíkulo tokante inkietut bou di personal di FM. Segun nos fuentenan, FM tin e intenshon pa pasa su empleadonan ku ta traha na laboratorio pa Bonlab. Sinembargo no tur empleado ta haña e situashon aki ideal. Segun e grupo aki ainda no por garantisá eksistensia di Bonlab. Pues e sentimentu di insertidumbre ta fuerte.

A n t e r i o r m e n t e BONERIANO a aserká Cherel Kwidama, kende ta presidente di AFBW, tokante e situashon aki sinembargo e no tabata

na haltura ofisialmente di e situashon. El a bisa ku solamente rumor nan a skucha. Bon mirá, e tabata konfia ku FM lo a pon'é na haltura promé ku ku dal kualke paso den e proseso aki.

Awor a sali na kla ku FM ta hopi mas leu ku solamente rumor. FM a keda insistí ku e organisashon tabata den un fase eksploratorio, sinembargo ya tin henter un dokumentu di konsepto riba mesa den kua ta deskribí e kuadro hurídiko i konsekuensianan pa e personal.

Pa AFBW esaki ta kompletamente inaseptabel i pa e sindikato, FM ya ta preparando pa tuma un desishon. Segun nos fuente AFBW ta eksigí transparensia i a duna FM 14 dia pa sinta ku nan i tambe pa wak e dokumentu ku ta riba mesa. Mientrastantu e trahadónan ketu bai ta den insertidumbre. Segun nos informashon nan a akudí na kas sindikal ku nan



Presidente di AFBW Cherel Kwidama, ku ta eksigí transparensia di parti FM

preokupashon.

Di FM pa Bonlab

Ta konosí ku FM ta mas den kolaborashon ku Bonlab. Pues por asumí ku FM ke focus riba loke ta nan negoshi prinsipal, duna kuido komo hospital. Mayoria tarea di laboratorio lo bai pa Bonlab. Esaki sigur no ta algu deskonosí. Mester mensioná ku algun tempu pasá FM a pasa basta tarea pa ZW-groep

i a trasladá un grupo di empleado.

Huntu ku esaki a terminá relashon di trabou ku un kantidat di empleado. A paga tur nan derechi, inkluso e kantidat di añanan di servisio. Tur kos ta indiká ku esaki tambe ta e intenshon pa e empleadonan di laboratorio. Pero FM no por atendé e asunto aki sin involukrá nan partner di kombersashon, den e kaso aki, sindikato AFBW.

Na opinion di Arthur Sealy:

“Mester mehorá enseñansa basá riba iniciativa di gruponan pafó di gobièrnu”

K R A L E N D I J K - Djaweps 10 di april 2025 tabatin un “Ban Topa” organisá pa medio di Rabin Baldewsing kordinadó nashonal kontra diskriminashon i rasismo huntu ku Unkobon. E intenshon tabata pa deliberá tokante siguridat di bida, pobresa i kosto di bida haltu. Esaki kolumnista Arthur Sealy ta trese dilanti.

E ta bisa ku Rabin Baldewsing a pidi pa presentenan bini ku tres proposishon pa e por presentá na gobièrnu hulandes. E anochi a kohe un rumbo polítiko kaminda a tilda Hulanda

di, kontra tur regla asta di Nashonnan Uní, ta nenga di yuda Bonaire kombati pobresa, pero ni un palabra di krítika riba Bonaire su gobernashon. Sealy: “Mi a puntra kiko nos presente den nos zona konfortabel, ta hasi na Bonaire pa yuda alsa kalidat di bida di siudadanonan pero no a haña reakshon. Ami ta di enseñansa i ta konvensé ku enseñansa ta un di e faktornan importante pa ataká pobresa. Mi a i ta sigui boga pa un HBO na Bonaire. Diputado den Heyer a bisa mi ku ta trahando riba un ‘Onderwijsvisie’. Mi ta sigur ku nunca a puntra

pueblo kiko e ta pensa i ken ta e personanan ku mester ta den un komishon asina.”

Pa Sealy esaki tambe ta défisit demokrátiko. E ta di opinion ku mester mehorá enseñansa basá riba iniciativa di gruponan pafó di gobièrnu. Konkretamente e ta bai aserká mas persona i gruponan independiente manera; Unkobon, Sindikato, Piskabon, Kriabon, i direktivanan di skol pa kompilá un plan di enseñansa ku ta inkluí un sentro di edukashon agrikola ku ta duna enseñansa riba e tópikonan; krio di bestia, vegetashon, medio ambiente i kuminda.

E ta bai pa un plan ku mester yega serka Rabin Baldewsing. Awor ta ora pa duna kontenido na e lema Traha Huntu. i legumai e burokrasia di Kolegio Ehekutivo. Sealy: “Tokante pobresa mi ta rekomendá e buki Armoede uitgelegd aan mensen met geld di Tim's Jongers. Tokante burokrasia di gobièrnu di Bonaire lesa e buki; Komt een land bij de dokter di Michelle van Tongerloo. Mi konklushon despues di djaweps ta ku nos hendenan ku sèn ku ta mendigá serka Hulanda ta mes òf mas pober ku esnan ku ta kai bou di e drèmpel di pobresa.”

HUSTISIA



Ladronisia for di vehíkulo

KRALENDIJK -- okupantenan tabata saka Djárason 9 di aprel a drenta potrèt, deskonosinan a bai keho di ladronisia for di ku sèn kèsh for di pòtmòn un outo di hür na Altamira i for di un tas ku a keda den Unjo na Rincon. e vehíkulo. Miéntras ku e Ta investigando e kaso.

Detenshon pa arma di kandela

KRALENDIJK arma di kandela. -- Djárason 9 di aprel Durante un entrada alrededor di mitar di tres hudisial na e kas, a di atardi, Grupo di Tarea Spesial, GBO, a detené e konfiská un arma di hòmber di inisial S.P.G.S. di kandela i supstansianan di 40 aña di edat na un probablemente narkótiko. kas na Sonrisa di Lac pa Investigashon den e kaso ta kontinuá. sospecho di poseshon di

Detenshon pa droga

KRALENDIJK E detenshon ta den -- Djamars 8 di aprel kuadro di un investigashon alrededor di mitar di dies di andando en konekshon ku mainta, a detené e hòmber un kaso di kontrabanda di di 54 aña di inisial R.M.D. droga ku a tuma lugá aña na Kaya Avelino Cecilia pasá. pa violashon di lei di opio Investigashon den e BES. kaso ta kontinuá.

Aksidente entre pikòp i SUV

KRALENDIJK dal den e SUV. -- Djaweps 10 di aprel Ambulans a transportá alrededor di mitar di tres shofür di e SUV pa di atardi, Sentro di hòspital pa tratamentu Notifikashon a risibí médiko. Personal di notifikashon tokante ambulans a hasi chekeo un aksidente entre dos médiko na e sitio mes ku vehíkulo na e krusada di un menor di edat. Kaya Nikiboko Nort i Shofür di e pikòp a Kaya Thomas Marchena. haña but pa manehá sin reibeweis. Na e sitio, polis a topa Polis a dirigí tráfiكو ku un pikòp i un SUV temporalmente na e ku tabata enbolbí den e sitio te na momentu ku aksidente. e servisionan konserní a Dor di keda sin duna keda kla ku nan trabou. duna preferensia, e pikòp a bai

Ladronisia di baikel eléktriko KRALENDIJK

-- Djárason 9 di aprel a drenta keho di ladronisia di un baikel eléktriko koló pretu Ouxi, modèl V-8.

E baikel tabata stashoná na un kompleho di apartamentu na Kaminda Essequibo i deskonosinan a bai kuné. Ta investigando e kaso.

Detenshon pa ladronisia


KRALENDIJK di Polis pa ladronisia. -- Djamars 8 di aprel E sospechoso a hòrta alrededor di 4'or di atardi, un baikel eléktriko na a detené e mucha hòmber un skol na Kaya Frater menor di edat di 14 aña di Odulfinus. Investigashon inisial B.C.V. na Warda den e kaso ta kontinuá.

Un biá mas aksidente krusada Kaya Pos di Amor/Kaya Kanari

KRALENDIJK Pa motibu di keda sin sitio mes. -- Djamars 8 di aprel A duna shofür di un di alrededor di 10'or di e outonan but pa manehá mainta, un aksidente entre sin reibeweis i e doño di dos vehíkulo a tuma lugá e outo, ku tabata presente na e krusada di Kaya Pos keha di doló i personal komo pasahero, a haña but di Amor, Kaya Kanari i pa motibu ku su vehíkulo Kaya Flamingo. tratamentu médiko na e no ta sigurá.

Aksidente Kaya Korona

KRALENDIJK - di dal un kachó. E outo di Djasabra 12 di aprel famia su tras no por a evitá alrededor di 7or di anochi e choke i a dal den e SUV. No tabatin herido i e daño material tabata limitá. Si a kousa basta molèster pa e fluho di tráfiكو. Pa kasualidat personal di CRS tabata riba e karetera nèt na e momentu di e aksidente i mesora a atendé ku e situashon.



HUSTISIA



Despues di gar'e ku bòshi mariwana:

Akusado ta siña su lès

KRALENDIJK- E hòmber Cesar S.M.(42) a siña su lès despues di a haña su mes ku problema ku Hustisia pa violá Lei di Opio. El a sigurá hues ku awor e ta riba e bon kaminda. “Mi a komprendé ku loke mi a hasi ta un eror. Awor ta bai mihó. Mi no ta bebe i huma hopi mas. Aworakí mi ta traha”, el a bisa. Segun e akusashon polis a gara Cesar dia 4 di aprel 2024 ku 297.7 gram di mariwana. Den e dosié penal tabatin indikashon ku Cesar tabata bende droga, sinembargo esaki no ta e akusashon. Solamente

poseshon di droga.

Abogado Anthony Nicolaas a hiba defensa miéntas fiskal Laura Stroink a representá Ministerio Públiko n(OM).

Cesar a splika ku e ta traha den konstrukshon riba base iregular. “Tin biá mi ta traha henter siman, tin biá mi ta stòp i warda 2 dia i sigui.”

“Ta bon ku awor bo tin mas entrada ku solamente ònderstant. Aña pasá bo a bisa bo ta bebe i huma hopi”, hues a bisa.

Cesar a sigurá hues ku e ta huma ménos i e ta bebe solamente 2 òf 3 biá den

luna. Hues: “A haña basta mariwana serka bo, kasi 300 gram. Mi por manda bo prizòn pa esaki. Kiko ta nifiká pa bo sí mi mandá bo prizòn. Sí bo mester sinta kastigu bo ta pèrdè bo trabou?” “Sowiso mi ta pèrd’e”, Cesar a kontestá.

Fiskal a bisa ku e tabata warda riba rapòrt di

Reclassering pero algu a bai robes ku e petishon. “Mi a puntra Reclassering pa un ‘update’ pasombra e tabata den suspenshon i bou di supervishon. Pero a resultá ku Reclassering nunca a atendé esaki”, segun fiskal.

Ministerio Públiko a demandá un kastigu di prizòn di 180 dia di kua 170

dia kondishonal. Tambe un kastigu di trabou di 120 ora.

Hues a haña e akusashon proba. Korte den Promé Instansia a kondená Cesar S.M. segun demanda di Ministerio Públiko.

Pues e no mester bai prizòn, si e ta keda ku kastigu kologá.



Detenshon pa kore fuma

KRALENDIJK -- Djamars 8 di aprel alrededor di 2’or di mardugá, a detené e hòmber di inisial E.R.V.C. di 62 aña di edat na Hanchi Amboina pa manehá bou di influensia di alkohòl.

Un patruya a para e sospechoso pa un kontròl rutinario i e no por a mustra un reibeweis. Aki a resultá

ku e no por a mustra un reibeweis pa motibu ku anteriormente polis a kita esaki despues di un aksidente ku a tuma lugá durante kua e tabata bou di influensia di alkohòl.

Durante kontròl, e agentenan a tuma nota ku e tabata mustra diferente karakteristiká di un persona

ku ta bou di influensia di alkohòl. A hasi un tèst di supla kuné for di kua a resultá ku el a konsumí mas alkohòl ku ta permití na momentu ku ta manehá un vehíkulo.

A detené e sospechoso i a hib’é Warda di Polis pa un anáalisis di rosea.

Delitonan kometé añanan pasá: Ministerio Públiko ta atendé kasonan bieu

KRALENDIJK- Resientemente por a nota ku Ministerio Públiko(OM) ta trese bastante kaso bieu dilanti hues. Echonan kastigabel ku a tuma lugá 2 òf 3 aña pasá i asta mas largu. Den mayoria di e kasonan aki, fiskal ta invitá e sospechoso na ofisina. E intenshon ta pa aki yega na un manera pa atendé ku e kaso sin tin ku bai Korte. Por ehèmpel por seponé e kaso. Esaki ta na momentu OM disidí pa no persigui un echo kastigabel. Pues OM por, pa vários rason, disidí di no persigui un sospechoso. Hopi biá ta skohe pa seponé un kaso ora ta konserní sierto delitonan mas chikí. Òf pa motibu ku no tin

suficiente prueba. Tambe por seponé un kaso bou di sierto kondishon. Den e kaso ei ta papia di un sepot kondishonal. Den basta di e kasonan bieu, fiskal su intenshon tabata pa duna e persona ku a kometé e delito un kastigu di trabou. Na momentu ku e persona no reakshoná riba e invitashon di OM, tin hopi posibilidat ku fiskal ta hiba e kaso dilanti. Unabes ku e kaso yega na konosementu di hues, e ta atendé esaki. E kastigu por ta mas haltu.



Detenshon pa violashon lei di identifikashon i ladronisia

KRALENDIJK -- Djárasen 9 di aprel alrededor di mitar di kuater di atardi, a detené e hòmber di inisial L.V.P. di 39 aña di edat na Kaya Filomena pa violashon di lei di identifikashon

BES. E sospechoso no por a identifiká su mes na momentu ku a dun’é òrdu pa hasi esaki e promé biá.

Mas lat riba e mesun dia, alrededor di mitar di ocho di anochi, na momentu ku mester a laga e sospechoso

den libertat, a pon’é na altura mesora ku ta deten’é awor riba sospecho di ladronisia, kiebro den kas i enkubrimentu. Esaki despues ku a dreña keho na polis di e echonan menshoná.

Muhénan Fuerte un realidat

KRALENDIJK -- James Finies a hasi e promé palabra pa loke ta trata komienso di un grupo di Muhé Fuerte Boneiru. Awe nos a dal un stap mas pa kambia Boneiru. Nos ta kanando den eksterior pa pone Boneiru riba lista nan di Nashonnan Uní.

Finies: “Na Boneiru ta laga musta ku nos no tin



sierto derecho i esei no ta bèrdat i ta inkorekto. Nos a traha ku tur partido polítiko na Boneiru. Pero nos ta ripará ku nan no ke sostené nos. P’esei nos a opta pa lanta nos mes partido polítiko. E stap di awe ta lanta un grupo di muhé fuerte. Damanan Boneriano bibá na Boneiru. Nan no ke pa nan yunan konfrontá problema pa futuro. P’esei e damanan akí tei. Nan no ta polítiko, pero nan ke sostené nos pa e lucha i esfuerso. E fundadónan mayoria ta presente awe.”

Asuntu di Boneiru ta algu mundial i no solamente den e área akí. E grupo ta yama nan mes muhé nan fuerte. Nan tei pa

e kambio na Boneiru i pa derechonan pa tur.

Marjolein Finies tabata e promé dama ku a papia na e okashon. “Mi ta parti di e grupo di muhé fuerte. Esaki ta pa laga e muhé nan di Boneiru sa di nan derecho. Ya nos ta kanando diferente kaminda pa logra kosnan.

Nos no ta nos so. Nos tin mas hende ku ta yuda nos. Un hende lo mirá mi ku kabei blanku i pensa kiko mi ke lucha pe. Esei no ta importante. Importante ta pa mi ta entusiasmo pa move i sali pa nos derechonan. Tin mas yòn ku ami den e grupo. Pues

tin di diferente edat ku ta forma e grupo.”

Davika Bissesar, presidente di The Bonaire Human Rights Society i Phenice Frans-Piar, a papia na e okashon loke nan ku nan ke logra i e meta di e grupo.



Progreso Parke Sabal Palm

KRALENDIJK -- Parke Sabal Palm di Boneiru situá den e área di Lima, ta tumando pasonan importante pa desaroyo di un reserva di naturalesa úniko i protehá. Un parti di e área será awor a keda kla, ku mas o ménos 675 meter di e 3.25 kilometer di hèkwèrk instalá. A instalá e tranké akí pa protehá e poblashon vulnerabel di Sabal Palm di

e influensianan di kabritu i buriku.

Trabou den pleno marcha

Ta bai realisá mas trabou den e próksimo lunanan. Esaki ta enserá kompletá e fèrf, instalashon di un porta di aksesu, kreashon di lugá nan di parker pa bishitantenan, ponementu di rutan pa kana i

ponementu di bòrchi di informashon.

E elementonan akí lo yuda habri e área pa bishitantenan sin perhudiká e ekosistema frágil. E parke lo habri den mas o ménos un aña, ku vários kaminda pa kana i kore baikel denter di e parke habrí pa públiko.

Protekshon ta esensial

E parke Sabal Palm ta destiná komo un área protehá pa Sabal Palm di Boneiru. E espesie akí ta presentá solamente riba nos isla, ningun otro kaminda na mundu. Aktualmente tin solamente 21 ehemplar madurá ku a sobra den naturalesa. P’esei ta di gran importansia pa bishitantenan trata e área ku rèspèt. No ta permití pa drenta e parke pafó di e kamindanan designá i ta estrictamente prohibí pa bai ku simia, òf mata yòn.

Lamentablemente, resientemente a hòrta 25 palma yòn for di e área. E akshon akí a resultá den pèrdida permanente di un porshon signifkante di e material genétiko di un di

e palmanan madurá. Esaki ta enfatisá e importansia di konsientisashon i protekshon.

Alternativa pa entusiastanan

Pa esnan ku lo ke planta un palma di Sabal den nan

hardin tin bon notisia, mata ta optenibel for di Tera Barra, kultivá ku kuido i sin hasi dañu na e poblashon natural. Huntu por pèrkurá pa e pida naturalesa úniko akí keda konservá pa futuro generashonnan.



Gerez N.J. Multifunction B.V.

ta buska

- 2 timmerman

- 7 metselaar

Pa mas inf. por yama +599 787-3758

J.S.C. Construction B.V.

ta buska

- lasser

- metselaar

Pa mas inf. por yama 782-7213

Panama meimei di un bataya di poder entre Merka i China

K R A L E N D I J K / PANAMA – Panama ku pa hopi tempu un punto trankil i importante pa komersio mundial, direpente a haña su mes den medio di un guera geopolítico entre Merka i China. Na kurason di e disputa ta Kanal di Panama, un ruta di awa vital ku ta moviendo alrededor di 5% di tur komersio marítimo mundial.

Akshonnan resien di Merka ku meta pa frena influensia Chines rònt di e kanal a lanta tenshon, ku Panama luchando pa mantené su soberania

miéntas e ta balansa relashonnan ku ámbos gigante ekonómiko.

E frikshon ta kuminsá na 2017, tempu Panama a kambia su lealtat diplomátiko di Taiwan pa China, habriendo porta pa miarnan di dòler den invershon i akuerdonan di infrastruktura Chines, inkluyendo kontrol riba vários puerto klave serka di e kanal.

Aunke e paso akí inisialmente a keda aploudí komo un señal di kresementu ekonómiko, ofisialnan di Merka a bira

kada bes mas kouteloso, mirando e presensia Chines komo un menasa stratégiko den Hemisferio Oksidental.

Presidente Trump a re-ensendé e debate na final di 2024 dor di eksigí pa Merka rekobrá kontrol di e kanal, kritikando e supuesto preferensial di Panama pa interesnan Chines. Panama a rechasá firmemente e alegashonnan akí. Presidente José Raúl Mulino, a respondé defendiendo neutralidat i propiedat di su pais riba e kanal, ku ta bou di kontrol

Panameño desde 1999. Apesar di e garantianan akí, preshon di Washington a oumentá. Na komienso di 2025, Sekretario di Estado, Marco Rubio, a bishitá Panama pa urgi ofisialnan pa redusí envolvimentu Chines den e region.


Algun dia despues, Panama a anunsiá su retiro for di e inisiativa di ‘Belt and Road’ di China, un señal kla di kambio di rumbo bou di influensia Merikano kresiente. Un di e desaroyonan mas signifkativo, a tuma lugá na mart 2025 momentu e kompania di invershon Merikano, BlackRock, a liderá un akuerdo di 23 bion dòler pa atkirí konseshonnan portuario di e kompania Chines CK Hutchison na Panama.

E moveshon ekonómiko stratégiko akí a keda sigui rápidamente pa un bishita di Sekretario di Defensa di Merka, Pete Hegseth, kende a buska akuerdonan militar inkluyendo e potensial

stashonamentu di forsa Merikano serka di e kanal.

E proposishonnan akí, dirigí pa mehorá siguridat regional, a hala krtika di siudadanonan Panameño ku ta kouteloso pa un regreso di presensia militar Merikano, ku a terminá na 1999.

Awor, Panama ta haña a mes den un akto di balansa delikado. Di un banda, e ta dependé di garantianan di siguridat i poder finansiero di Merka, di otro banda, el a benefisiá di invershon i komersio Chines. Aunke ámbos poder ta afirmá di respetá soberania di Panama, nan rivalidat ta pone e nashon chikitu di Sentro Amérika den un posishon kada bes mas inkómodo. Ku tenshonnan oumentando i atenshon mundial enfoká atrobe riba e kanal, e kapasidat di Panama pa afirmá un polítika independiente lo keda poné na prueba manera nunca ántes.



Entrante promé yanüari 2026:

Biblioteca rumba pa bira fundashon

K R A L E N D I J K - Entrante 1 di yanüari 2026 Bibilioteka Públiko di Boneiru ta un organisashon independiente. Esaki ta enserá ku Biblioteca ta bira un fundashon, pues lòs for di Entidat Públiko Boneiru (EPB). Jennifer Pocorni-Martis, kende ta hefe di Biblioteca ta splika ku e proseso pa kristalisá esaki ta tumando lugá. “Nos ta den un situashon spesial na e momentu akí. Ainda nos ta parti di EPB pero funshonando independiente”, e ta bisa.

Un ‘Kwartiermaker’ for di Hulanda ta aki pa asina yuda independisá

Biblioteca. “Ya el a yuda nos ku e mudansa awor e ta yuda nos kon pa bira un fundashon, yega na un Konseho di Supervishon i otro rekisitonan”, segun Pocorni-Martis.

Ta lògiko ku e kambio di struktura aki tin konsekuensianan pa e personal. Entrante promé di yanüari nan no ta ámtenar mas. Pocorni-Martis no ke amplia ainda riba e tópiko akí.

Pocorni-Martis: “Mi no ta bai mashá den detaye pero ta atendé situashon di e trahadónan debidamente.”

Na momentu Biblioteca bira un fundashon e por

hasi petishon na Fondonan na entre otro na Hulanda i Oropa pa asina por hasi mas proyekto i aktividat. Komo parti di gobièrnu, esaki no ta posibel. Pocorni-Martis ta splika ku ántes Biblioteca no tabatin sufisiente sèn pues tur e budget” tabata bai na kumpra buki i organisá Siman di Buki pa Mucha. Pero tin hopi mas programa i aktividat ku Biblioteca por hasi. I e fondonan pa esaki tei pero no komo parti di Gobièrnu.

Banda di esaki e ta bisa ku últimamente gobièrnu a hasi posibel pa Biblioteca por organisá mas aktividat.



Gabinete: Derecho di importashon mal notisia pa kompanianan

K R A L E N D I J K / DEN HAAG -- Gabinete ta yama e derecho di importashon Merikano mal notisia pa kompanianan i konsumidónan Hulandes. “Hopi kupo di trabou ta den wega”, asina Minister di Komersio Eksterior Klever ta bisa. Djárason, Presidente Trump a anunsiá ku Merka lo imponé derecho di importashon riba tur otro pais.

Trump ta papia di nivelashon di tarifanan, pasobra segun e, otro paisnan tambe ta hasié ku produktonan Merikano. E tarifanan ku Merka ta kobra riba produktonan estranhero ta generá plaka pa Gobièrnu Merikano.

E gobernashon di Trump tambe ta spera ku kompanianan Merikano lo por kompetí mihó den e merkado mundial, spesialmente China. Pa produktonan Chines, e derecho di importashon ta 54 porshento. Pa tur produkto di Union Europeo, inkluyendo Hulanda, e kobransa pa benta na Merka ta 20 porshento. P’esei e produktonan akí lo bira 20 porshento mas karu pa kompanianan i konsumidónan Merikano.

Esaki por kousa ku benta ta baha. Pa kompanianan Hulandes ku ta dependé di e merkado Merikano, esaki ta nifiká ménos ganashi.

Klever ta kere ku kordinashon ku e 27 paisnan di Union Europeo ta esensial: “Mi lo ta reuniendo ku Komisario Europeo pa komersio i e ministernan Europeo di komersio djaluna. Nos ke por hasi komersio, pero nos lo no duda pa tuma kontra medida si ta nesesario.”

Union Europeo ke negoshá ku Merka tokante e tarifanan promé pa asina kita e tarifanan for di mesa. Merka ta e partner komersial mas importante pa Hulanda despues di Union Europeo, pues e wega ta haltu. “Al kontrario, Union Europeo tambe ta un merkado komersial importante pa Merka, pues nos ta en realidat kondená na otro,” Klever ta bisa. “Nos no mester hasi nada lihé.”

Klever no ta di akuerdo ku e historia polítiko di Trump ku Union Europeo mes ta pidiendo impuestonan haltu.

VVD ta sostené tumamentu di kontra medida si ta nesesario, asina Parlamentario Kamminga

ta bisa. “Nos mester por tuma kontra medida si nos no por yega na un akuerdo ku Merka. Tambe tin otro medidanan posibel ku no ta imponé tarifanan riba Merka nos mes.”

Kamminga ta pensa riba e akuerdo komersial di Mercosur i akuerdonan komersial ku Canada i México. “Nos mester tene un bista riba e sektornan ku esaki lo dal duru”.

Política interno

Kamminga tambe ta kuestioná e splikashon di Trump di e impuestonan. “Si bo mira kon el a presentá djárason, ku tur tipo di sifra, mi no sa di unda e sifranan ei ta bin,” e ta bisa. “Trump ta prepará pa usa e tipo di medidanan akí pa su propio política interno i Union Europeo tin ku hasi algu a kambio.”

CDA ta kompartí e análisis ei. “Loke Trump ta hasiendo awor ta prinsipalmente pa konsumo interno. Nos no mester permití nos mes pa keda fiá na esei. Nos ke evitá un guerra komersial, pero bo no mester permití bo mes pa keda chantagiá tampoko.”

Boswijk ta komprondé ku China lo bai konfrontá



ku un kobransa enorme. “China ta krea un tereno di wega desigual pa medio di sosten enorme di Gobièrnu pa kompanianan. Nos komo Union Europeo mester aktua huntu ku

Merka kontra China.” Tòg polítikonan Hulandes no ta completamente pesimista.

Boswijk: “Kwater aña di Trump lo no destruí un aliansa ku ta eksistí pa mas ku 80 aña.”

REFLEKSHON

DEBE KANSELÁ

Dor di kanselá e sertifikado di debe ku tabata konsistí di dekretonan kontra nos i ku tabata hostil pa ku nos; i El a kit’é for di kaminda dor di klab’é na krus. Kolosensenan 2:14(BS)

Ken no konosé e palabra “debe” awendia? Ta e kantidat di sèn ku nos mester paga bèk na un persona òf instansia, sea pasobra nos a fia sèn pa kumpra algu, òf nos a kumpra algu pa paga poko poko. Nos ta bira debedó, nos mester paga òf kanselá e debe.

Bo tabata sa, ku nos tur tin un sertifikado di debe ku nos mester paga?

E versíkulo di awe ta bisa ku Hesus a kanselá nos sertifikado di debe.

Kiko ta e debe ku kada un di nos tin anto?

E debe ku nos tin ta pasobra nos ta pekadó i ta hasi piká.

Romanonan 6:23a ta bisa: Pago di piká ta morto, dor ku nos ta hasi piká, nos a bira debedó i mester paga un preis. E preis ta morto; físiko i spiritual.

Ma Dios a stima nos asina tantu ku El a manda Su Único Yu Hesus, pa bin muri na nos lugá i paga e preis di nos piká pa nos.

P’esei e segundo parti, Romanonan 6:23b ta bisa: ma e don (òf regalo) di gracia di Dios ta bida eterno den Cristu Jesus, nos Señor. Morto i resurekshon di Hesus ta hasi mi liber di kondenshon i ta duna mi bida eterno.

Si asina mes, no morto pero bida eterno den Hesus.

Reflekshoná e siman akí riba Hesus, e regalo di Dios pa nos bida.

Yam’É danki ku El a muri na bo lugá i pidi’É pordoná bo tur bo pikánan i aseptá Su regalo di bida eterno.

Pasku ta: Hesus a tuma nos lugá riba krus i a kanselá nos debe!

Miralda Paula-Frans
Produkshon PGM

Programanan di Bonaire.tv

TELBO kanal 70

Flamingo TV kanal 23

Djaluna 14 april 2025

12.00 Herensia:

13.00 Aki Boneiru:

14.00 Herensia Siglo 20:

15.00 BAPA:

Felipa Sint Jago-Wijman

Segni Bernardina

Petra Beaumont

Erich Arias

16.00 Herensia:

17.00 Aki Boneiru:

18.00 Herensia Siglo 20:

19.30 Puerto Latino:

Casimira Stefanita Coffie-Trinidad

Rolando Martinez

Lucia Otilia Balentin

Luis Zárraga

20.00 Herensia:

21.00 Aki Boneiru:

23.00 BAPA:

Criselda Soliana-Rosa

Siklo di Charla Frans Booi - 2. Bob Harms

Charlton Thomas



Festival Kanto Krioyo 2025

K R A L E N D I J K — Festival Kanto Krioyo 2025 tabata tremendo. E final a kuminsá djasabra anochi i kaba mardugá di djadumingu.

Reakshon di hendenan presente: “Tur ta bon i tin algun, no unu ku ta hopi serka di otro na nivel. Kon huradonan ta hasi?” Algun di e reakshonnan durante e anochi promé ku resultado final. Kantidat enorme di hende a hala bola, specialmente pa karga agrupashonnan musikal konosí di Rincon.”

Diputado Anjelica Cicilia a subi esenario i a gaba kon el a balia i gosa

e anochi. “E aktivitat aki ta hopi importante i mester sigui karg’é. Mira kuantu hóben nos tin ku asina hopi talento. Nos tin ku kuida nan pa den futuro nan tei pa nos”, el a bisa.

Durante e anochi, esposa di Pandjua (†) a subi esenario i el a gradisí pa e rekonosementu pa Pandjua (†). El a menshoná ku ta bèrdat, ku MOK a bini na kas pa puntra i informá ku nan ta bai dediká e Festival Kanto Krioyo 2025 na Pandjua (†). Esaki a emoshoná hopi hende e momentu. Komentarionan e anochi di e festival, e kos aki ta grandi su resultado

lo ta hopi difisil pa hurado, saka un ganadó. Kompará ku e Kanto Krioyo Hubenil, hopi hende tabata sa ku for di momentu ku e último kantante a presentá riba esenario djabièrnè anochi, papiamentu a kuminsá ku e ta bai gana. Den e adultonan tabatin diferente kantika tòp, hopi difisil pa skohe unu. Sigur mester skohe unu. No por tin dos number un. Tòp 10 a risibí un regalo di Between 2 Buns.

Presidente di hurado a bisa trabou duru, nan a hasié rápido, kontando e puntonan i yega na e

ganadó. Notabel bèrdat e resultado tabata kla rápido.

Momentu Edson Frans a presentá riba esenario, tabatin diferente show rondó di su presentashon. Entre otro un chubatu ku tabata bai bini den públiko, el a hala bon atenshon.

Esaki ta e dies finalistanan: Dayron Coffie, Edson Frans, Johnny Vlijt, Jonathan Martijn,

Jurnick Clarendra, Luis Moka, Raychantaly Coffie, Roderick Rocco Franken, Sigmaira Mercera

i Wesley Sint Jago. E kuater finalista a resultá: Roderick Rocco Franken di Aruba, 3 finalista Luis Moka, 2 finalista Jurnick Clarendra, promé finalista Raychantaly Coffie i Ganador Apsoluto Edson Frans.





Na Kaminda Pa Dia di Rincon

IKC Rincon a selebrá

KRALENDIJK -- Tur aña IKC Rincon ta selebrá na luna di mart i aprel, ambiente di kultura ku e muchanan. Ta siña e muchanan kultura di Boneiru pa nan lanta ku

esei den nan.

Anita Pietersz, kargadó di e aktividat a bisa: “E aña akí ta siña e muchanan kosechá, kasnan di kunuku i nan a bishitá diferente lugá kultural, entre otro

Mangazina di Rei, posnan i Ecco.

Meimei di e temporada ta enbolbí mayornan pa organisá un marshe huntu ku e muchanan na skol. Esei ta loke a sosodé e atardi

na skol. E biá akí tabatin kuminda krio, esta kabritu, baka stobá i kos di pasaboka konosí di ántes i djus di tamarein, orégano i mas. Ta un aktividat pa públiko riba e atardi. Meta

di e aktividat ta pa enbolbí e mayornan na e krèsh. E ta duna semper bon resultado. Nan ta hasié tambe ku hopi entusiasmo. Potrèt ta ilustrá e momentu di bendementu di kos na skol.



Impreshonante!

Maestro di seremonia Roman Koeke

KRALENDIJK - Aparte di e bunita presentashon di kada mucha riba esenario, e maestro di seremonia Roman Koeke huntu ku Aymed Ayubi, a hasi un tremendo trabou. Apesar ku Aymed a guia un kompa yòn riba esenario, komo maestro

di seremonia, e mucha a entretené e públiko.

Aimed mes a gusta e forma kon e kompai a presentá riba esenario i komuniká ku e públiko. Tantu mucha i adulto a keda ekspresá, kon kontentu nan ta ku e forma ku e mucha a atendé riba esenario komo

maestro di seremonia. Niun hende por a bisa ku nan a pasa un momentu ku tabata laf. Asta poko preshon, e kompai chikitu maestro di seremonia, a pone riba huradonan pa nan ta poko mas rápido ku e resultado. E tabata stret riba e kosnan, manera ta bisa.

Si públiko no reakshoná riba loke e papia, e mes ta bisa nan kiko pa hasi, esta pa hari i animá e momentu.

Tremendo. Sigur bon ehèmpel pa otro organisashonnan, laga nos mes hendenan guia aktividatnan. Ta importante pa siña nan for di chikitu,

esun ku ta deseá, pa momentu nan ta hóben òf adulto, nan mes por fungi den e funshon ku nan a siña pe.

Den e kaso aki Aymed a sostené Roman riba esenario, pronto e so por dirigí e show.





Juliëndra Janga ganadó Festival Kanto Krioyo Hubenil

KRALENDIJK -- Muchanan tantu riba esenario i abou dilanti di e esenario, a gosa na nan antoho, baliando kantando ku kada partisipante djabièrnè anochi.

Tremendo kada mucha tabata, loke hendenan den Stadion Antonio Trinidad a komentá e anochi.

Juliëndra Janga a presentá tremendo riba esenario, kanta i balia ku

su kantika komo último partisipante e anochi.

For di promé ku resultado, ya hopi hende tabata komentá ku Juliëndra ta e ganadó di Festival Kanto Krioyo Hubenil. Juliëndra promé ku a menshoná su nòmber, por a mira kon nèrvioso e tabata i sa ku e ta e ganadó.

Esei el a ekspresá nèt promé ku a menshoná su nòmber. Luiginio

‘Luis Moka’ Molina, ta kompositor di letra i melodia di e kantika ku Juliëndra a gana kuné. Un tremendo festival un i tur a

gosa relahá e anochi. Dos diputado tabata presente pa e okashon.

Diputado Nina Francees-Den Heyer i diputado di Sint Eustatius.

Públiko a gosa kon ámbos diputado a hasi entrega di premio.

Christopher Frans tabata presidente di hurado pa e anochi.





Dia di Rincon ta haña èkstra pelíkula histórikiko nobo

KRALENDIJK

Aktualmente ta filmando un pelíkula kòrtiku spesial na Rincon pintoresko, e pueblo di mas bieu na Boneiru, ku ta trese historia di e isla na bida. Bou di direkshon di direktor i Rinkonero Sendion Balentin, ta krea un pelíkula di dies minüt ku ta portretá outéntikamente bida diario ochenta aña pasá. Esaki di akuerdo ku un publikashon di Bonaire. nu.

Riba un kunuku trankil banda di Rincon, rondoná pa kunuku di maishi ta zuai, Balentin ta kompartí su pashon pa e proyekto. “Nos ta trahando e pelíkula akí no solamente pa konmemorá pasado, pero spesialmente pa konektá nos komunidat na su raisnan,” e ta bisa.

Pa medio di investigashon histórikiko

-- profundo i e konosementu di ekspertonan kultural lokal manera Boi Antoin i Wesley St. Jago, a krea un skript ku ta hiba e televidente bèk na un tempu kaminda simplisidat i interkonekshon tabata klave.

E estreno lo tuma lugá dia 16 di aprel na Plasa Cocari na Rincon, kaminda lo lanta un sine na aire liber spesialmente pa e okashon. Entrada ta grátis, pues tur hende por disfrutá di e homenahe úniko akí na historia.

E pelíkula ta na Papiamentu, pero tin supítulo Hulandes i Ingles, di manera ku bishitantenan internashonal tambe por tira un bista riba pasado di Boneiru.

Un elemento spesial di e pelíkula ta e músika.

“Nos a skohe kantikanan outéntiko ku ta reflehá e alma di Rincon di ántes,” Balentin ta bisa. “Hopi di e tesoronan musikal aki kasi no ta keda skuchá awendia, pero nan ta forma un parti inseparabel di nos herensia kultural.”

Balentin ta enfatisá ku e pelíkula no solamente ta destiná pa ta dibertido, pero tambe edukativo. “Nos ke mustra e generashonnan mas yòn di unda nan ta bini. E pelíkula ta mustra e trabou duru riba tereno, bida ku bestia i e lasonan estrecho ku komunidat ku semper a karakterisá Rincon.” Balentin su ambishon ta ekstendé mas leu ku e pelíkula kòrtiku akí. Den futuro e ke traha un pelíkula largu na gran eskala ku ta deskribí henter historia di Boneiru, for di e habitantenan original, te tempu moderno. “Nos kier pa tur hende komprondé

ku Dia di Rincon ta mas ku un dia di fiesta. E ta un selebrashon di ken nos ta.”

Ku e pelíkula akí, Rincon no solamente ta enrikesé su propio herensia,

pero tambe ta kontribuí na Boneiru su tesoro kultural. Un oportunidat úniko pa mira, skucha y sinti e pasado komo sifuera bo mes ta einan.



Helikòpter a kai matando seis persona

KRALENDIJK/NEW YORK -- Un helikòpter a kai den riu Hudson na New York. Tur seis okupante a muri. Nan ta e piloto i un famia Spaño ku tres yu ku tabata di fakansi na New York. Nan a tuma un buelo di tour.

E helikòpter, un Bell 206, a kibra den dos durante buelo. Imágennan ta mostra e helikòpter ta kai i dal den awa. Un di e okupantenan tabata un máksimo ehekutivo na e sukursal Spaño di e kompania di teknologia Siemens. Su kasá, kende tambe a fayesé, tambe tabatin un posishon haltu na e kompania ei. Nan yunan tabatin 11, 5 i 4 aña.

E helikòpter a lanta buelo alrededor di 3'or di atardi pa un buelo di turismo for di un di e plataformanan di


helikòpter na Manhattan. Despues di mas o ménos dies sinku minüt, algu a bai robes.

Na momentu di e aksidente e wer tabata trankil ku bon visibilidat. Outoridatnan Merikano ta investigando e kousa di e aksidente.

E helikòpter ta drumi kabes abou den awa, banda di un shaft di ventilashon di Holland Tunnel ku ta kore bou di Riu Hudson. A rekuperá tur kurpa.

E helikòpter tabata pertenesé na e kompania di buelo di turismo New York Helicopter. E doño a bisa e korant New York Post, ku el a keda den shòk.

Tin hopi helikòpter ta bula na New York, tantu pa biahenan di trabou komo pa buelonan turístiko.



Vacatureprofiel: Informatie en Beheer (1 Fte)

Bedrijfsomschrijving:

Het Kadaster Bonaire (KB) is verantwoordelijk voor het beheer en de registratie van vastgoedinformatie op Bonaire. De uitvoering van de kadastrale taken in Caribisch Nederland is sinds 1 januari 2021 ondergebracht bij één organisatie. Door verantwoording van de kadasterfunctie op de BES-eilanden te verschuiven van het eilandbestuur naar het Kadaster en de openbare registers Nederland.

Functieomschrijving:

Als Medewerker Informatie en Beheer ben je verantwoordelijk voor het accuraat beheren en verwerken van vastgoedinformatie binnen het Kadaster Bonaire. Je werkt nauw samen met diverse afdelingen binnen Kadaster Bonaire en externe stakeholders om de kwaliteit en toegankelijkheid van de vastgoedinformatie te waarborgen.

Taken en verantwoordelijkheden:

- Verwerken van vastgoedtransacties en mutaties in de registratiesystemen van KB;
- Onderhouden en actualiseren van de vastgoeddatabase en digitale archieven;
- Verzorgen van rapportages en informatieaanvragen van interne en externe klanten;
- Afhandelen van klantvragen en verstrekken van informatie over vastgoedgegevens;
- Bijdragen aan de ontwikkeling en implementatie van verbeteringen in informatiemanagementprocessen;
- Samenwerken met andere afdelingen binnen KB voor een integrale dienstverlening aan klanten.

Functievereisten:

- Bij voorkeur een afgeronde Mbo-opleiding in een relevante richting zoals Administratie, Informatiemanagement of Vastgoed;
- Ervaring met gegevensbeheer en administratieve processen is een pré;
- Affiniteit met vastgoedprocessen en -wetgeving is een pré;
- Goede mondelinge en schriftelijke communicatieve vaardigheden in het Nederlands en bij voorkeur ook in het Papiamentu en Engels;
- Vaardigheid in het werken met MS Office en ervaring met databasemanagementsystemen is een pluspunt;
- Zelfstandig, accuraat, proactief en stressbestendig.

Aanbod:

- Een uitdagende functie binnen een dynamische werkomgeving op Bonaire;
- Mogelijkheden voor persoonlijke ontwikkeling en interne opleiding;
- Een salaris van maximaal schaal 7 RCN (Rijksdienst Caribisch Nederland);
- 8,33% vakantiegeld;
- 13e maand van 8,33%;
- Pensioenvoorziening PCN (Pensioenfonds Caribisch Nederland);
- 23 vakantiedagen (o.b.v. 36-urige werkweek).

Het gaat om een tijdelijke aanstelling van drie (3) jaar met uitzicht op een vaste aanstelling (bij goed functioneren). Op jouw aanstelling zijn de RCN arbeidsvoorwaarden van toepassing.

Sollicitatieprocedure:

Ben je geïnteresseerd in deze functie? Stuur jouw sollicitatiebrief naar ons Hoofd Informatie en Beheer, Marcelo Zuca (marcelo.zuca@kadorbonaire.com). Vermeld in je sollicitatiebrief duidelijk waarom je geschikt bent voor deze rol en wat je motivatie is om bij Kadaster Bonaire te werken. Wil je meer informatie over deze functie? Ook hiervoor kun je contact opnemen met Marcelo. Een veiligheidsonderzoek en het opvragen van referenties kunnen onderdeel zijn van de selectieprocedure.

Tribon bayena mirá durante investigashon di koral

KRALENDIJK -- Investigadónan a hasi un opservashon spesial durante investigashon di ref di koral pa STINAPA. E tim a mira tribon bayena dos biá den un dia miéntras nan tabata sambuyá na dos diferente lokalidat ront di Boneiru.

“Mira un tribon bayena durante un buseo ta spesial, pero mira dos diferente ehemplar na diferente lugá riba e mesun dia, ta un eksperensia berdaderamente úniko,” e investigadó Ramon de

Leon, a bisa. Segun e, e bista straño akí ta enfatisá e status spesial di e mundu bou di laman di Boneiru.

Tribon bayena no solamente ta esun di mas grandi di tur tribon, pero tambe e piská di mas grandi na mundu. E kos spesial ta, ku a mira tur dos piská na Kralendijk, dilanti di e resortnan djis nort i djis pariba di e sentro.

E bista akí un biá mas ta konfirmá Boneiru su status komo un di e mihó destinashonnan di buseo na mundu.



Zhung Kong B.V.

ta buska

- 1 warehouse assistant - 1 cook

-mester tin VOG, karta di rekomendashon i eksperensia

Pa mas inf. por yama **717-6688** of mail: **info@dragoncitybonaire.com**

Bon biní na bo kolumna ‘Riba kabes di klabu’ i nos ta deseá henter e pueblo di Boneiru un felis siman.

Den kuminsamentu di april i den pleno kuaresma, e ilustre miembro di Konseho Insular pa e partido UPB, Pablo ‘James’ Kroon, a disidí di ranka sali sin ningun previo aviso. Netamente den kuaresma ta parse ku hendenan a aserk’é pa falta di bon gobernashon aki na Boneiru. Hopi ta insistí, segun e eks diputado, ku UPB mester hasi oposishon mas fuerte i tumba Gobièrnu. Ounke ku e gobernashon ta na wèrki i ku mal gobernashon ta na órden di dia, mi no ta di akuerdo ku mester enbolbí oposishon den e desaster aki segun e eks diputado i aktual miembro di Konseho Insular pa UPB.

Stratégikamente Kroon a mustra riba e resultado di e elekshon di 2023 tresiendo dilanti ku ta UPB i PDB a logra 3 asiento kada unu, MPB 2 asiento i M21 no a logra un asiento kompletu, pero a logra haña 75% di e kiesdeler i asina conforme e lei elektoral tin derecho riba un asiento.

Ta un miembro ‘atrobe’ a hòrta asiento di MPB bai kuné i huntu ku M21 i PDB a hunta 5 asiento ku ta un mayoria den Konseho Insular. Kroon ta konkluí stratégikamente ku Partido Demokrat no tin 5 asiento pa nan por a nombra tur e tres diputadonan, supuestamente tur salí, òf ku vínkulo ku e tolda kòrá.

Tur loke ku pasa den Gobièrnu, ta ku bendishon di e buladó di kurá i M21, pasobra ku 3 asiento di Demokrat no por goberná su so.

Ku hendenan ta preokupá tambe ku e rumbo di Partido UPB e eks diputado Kroon no ta trese dilanti. Ku hendenan ta preokupá ku apesar di su riba mil i piku votonan personal ku el a haña den último elekshon, te ainda e no ta lider di frakshon. Ku hendenan ta preokupá, ku e aktual lider di frakshon den Konseho Insular, automatikamente no ta sede e posishon ei pa Kroon, tampoko no ta tende nada di esaki. Ku hendenan ta preokupá ku e frakshon di UPB den Konseho Insular kasimente no ta hibando oposishon i ningun hende sa kiko ta e direkshon di partido i ku no tin un lider polítiko i tampoko un lider interino, ta parse ku e hendenan akí tin kompletamente rason.

Tur e bunita storia a kuminsá den un reunion di un Komishon Fiho den kabamentu di mart último, ora e konsehal di M21 a reakshoná furiosamente riba insinuashonnan di Diputado Abraham ku miembronan di Konseho Insular ta hungando política ku e problema na Landfill i ta ekspresá nan mes den forma populista en bes di fokùs riba e problemátika ku ta hopi urgente.

Den un akto di retaliashon, e frakshon di M21 a presentá un moshon pa legalisá mariwana, òf kultivo lokal, lokual no a kai den bon tera serka Diputado Nina den Heyer, ku segun e hipótisis di konsehal Kroon, ta di Partido Demokrat. Bastante iritá e diputado a bari e moshon for di mesa i M21 forsosamente mester a hala e moshon



Skirbí pa:
Dr. Willem Cecilia

atras i atrope mester a guli un bòftá. Konosiendo M21 e kos lo no keda einan i ku esei sin mas mester bisa ku tin tenshon fuerte den e koalishon aktual.

E konsehal saliente di MPB, Junny Wout, den su diskurso di despedida a trese dilanti ku e gobièrnu aktual no tin desensia di kontestá preguntanan i ta traha plan so, pero nada konkreto pa pueblo. E kos akí no a kai den bon tera serka e diputado presente, Clark Abraham, ku a disidí di hasi sierto remarkenan riba esaki. E diputado ta invitado den e reunion i e no tin nada di remarká riba e diskurso di un miembro saliente. Ta un falta di rèspèt esaki ta pa ku Konseho Insular. Pero ni e presidente, ni e grifir, ta na altura aparentemente di esaki.

Pa evitá eskalashon di problema den koalishon, Partido Demokrat a disidí di mobilisá dos miembro di frakshon pa saka algun pamfleta polítiko pa defendé nan Gobièrnu. Esei na su turno korektamente a indusí e miembro nobo di MPB, Hennyson Thielman, pa medio di un komunikado pa puntra su mes ta riba kua planeta e hendenan aki ta biba. Nan no ta skucha tur e reklamonan ku tin den tur skina ku bo bira na Boneiru?. Sarkástikamente Thielman ta bisa ku mirando e kantidat di biaha ku e hendenan aki ta subi avion pa bai keiru, uzando sèn di pueblo, e ora ei bo ta komprondé ku ta p’esei nan no sa kiko ta pasando riba Boneiru.

Nos mester bisa ku miembronan di Konseho Insular tei pa representá e pueblo di Boneiru i kontrolá Gobièrnu i nan no tei pa defendé Gobièrnu i tampoko insultá nan koleganan den e konseho dor di yama un di nan ‘Rotònde’ kreando polarisashon. Laga defensa di Gobièrnu pa e diputadonan mes, òf pa aktivistanan i miembronan di direktiva di e respektivo partidonan. Kon e pueblo di Boneiru òf instansia por yega serka un miembro di Konseho Insular ku un problema, si e miembro akí solamente ta defendé gobièrnu kaminda palpablemente por proba ku kosnan no ta kana bon na Boneiru?.

Lo ta bon si e miembronan di Konseho Insular en kuestion puntra Gobièrnu kon grandi e chèns ta ku e kuenta anual di 2024 lo haña aprobashon di e akoutènt eksterno.

Pasa dushi dlanan di fiesta.

BLANKU RIBA PRETU

Mas i mas nos ta konstatá e tantísimo intentonan pa influensia prensa. Algu ku BONERIANO semper a bringa kontra dje. Hustamente esaki ta pone ku algun gremio riba e isla aki no ta masha fanátiko di e matutino aki. Sí, tur hende mester atmití ku nos ta sali na vanguardia di libertat di prensa. No ta sera nos boka.

Loke ta resaltá mayoria biá ta e echo ku ta lubidá ku BONERIANO ta simplemente e mensahero. Nos no a okashoná e problema òf konflikto. Klaro ku nos ta sak'e na kla pasombra esei ta nos meta. Ta esaki ta pone ku siudadanonan ta aserká nos ku na doló. Ki otro rason bo tin komo prensa sí otronan ta disidí kiko, kon, ki ora bo ta divulgá un situashon? Remarkabel ta ku hustamente instansianan ku mester apoyá e libertat di prensa, konsientemente ke trapa esaki.

E situashon lamentabel aki a tuma lugá djasabra 5 di april último. Despues di bastante inkietut na Liseo, e skol a disidí na organisá un enkuentro ku mayornan. Nos ta supone pa kalma e sentimentunan. A invitá

prensa, sinembargo ora prensa a yega na e orario palabrá a disidí e momentu ei ku prensa mester a warda kasi 2 ora promé ku representantenan di e skol a papia ku prensa. Un situashon no masha bunita i bon mirá, asta falta di rèspèt. Sinembargo por konsiderá esaki komo kosnan ku por pasa. Algu organisatorio por a kana robes.

Lokual sí no tin niun klase di esküs òf splikashon ta e aktitut di e persona ku SGB a enkargá komo moderador. Promé ku prensa a haña e chèns di bisa algu e moderador ku un tono di dosente ku ta papiando ku mucha chikí a bisa ku e ke tur pregunta spesífiko delantá. "Mi ke e preguntanan promé ku hinka e pènel den situashon ku no ta na nodi, nos ke e preguntanan adelantá pa nos wak si nos ke kontestá nan òf si nan tin benefisio pa nos komunitat", ta lokual e moderador tabatin kurashi di bisa.

Na momentu ku Liseo/ SGB a organisá e enkuentro ku mayornan i ku prensa a krea e sentimentu ku e skol ta boga pa transparensia. Ku nan tabata ke papia habrí, kla i raspá pa asina bai bèk na e trankilidat tan nesesario pa e

alumnonan. Pero parse ku lo kontrali tabata e intenshon. E moderador a disidí na hasi pregunta na prensa tokante kiko lo ta e titular despues di e enkuentro. Asta el a duna sugerensia pa prensa bisa ku skol, mayornan i gobièrnu ta uni pa ambiente sano pa nos muchanan. E moderador a denominá e fayo aki komo su enkurashamentu na prensa. Den mesun rosea e ta bisa ku prensa mester ta positivo no opstante ku notisia negativo ta bende. E ekspreshon di parti di moderador tabata asina absurdo ku BONERIANO ta kuestioná e motibu ku SGB a organisá e enkuentro aki. Kiko tabatin tras di tur esaki? Pa influensia prensa?

Un moderador su tarea ta básikamente pa guia e kombersashon entre e pènel i prensa den bon kaminda. E proseso ta den su man i finalmente tur partido tin ku sali ku e sentimentu di a puntra i a kontestá tur loke ta nesesario pa asina komunitat sa loke a tuma lugá. E moderador den e kaso aki a haña ku ta su deber pa duna 'lès' na prensa. Mas ainda ta difisil pa pensa ku e moderador aki aktua riba su mes, e mester a palabrá adelantá ku e pènel kiko i kon i e ta bai guia e proseso.



BONERIANO sigur no por kere ku e moderador aki riba su mes a kometé e vupá aki, sin a lo ménos papia ku representantenan di e skol òf Nolly Oleana i Nina den Heyer ku tabata parti di pènel. Ora a aserká e persona aki pa fungi komo moderador, mester a dun'e instruksion, no por ta asina ku el a aktua riba su mes di e manera aki. Komo moderador el a papia pa e skol, un instituto ku hustamente ta e ehèmpel pa nos hubentut. Kiko nos tin ku konklui komo prensa? Skol ta transparente semper i kuando ta reportá solamente kos bon?

BONERIANO no ta ataká e persona ku a fungi komo moderador, nos ta dun'e e benefisio di duda. Sí, nos ke bis'e pa no brua prensa ku relashonista públiko. Nos no tei pa hasi propaganda, nos tei pa splika e situashon manera e ta. I sí, tin bai ta trata di situashon sensitivo i preokupante. Sinembargo nunca nos lo hinka un situashon den un bachi ku e no ta meresé. E si e moderador ke pa nos klùr e situashon mas kolorido ku e ta, wèl ta e mes lo mester kuminsá pinta. Djis un enkurashamentu.

MONCHI & TONCHI

Tonchi, mi ta gosa oposishon. Banda di polítika, nan ta stimulá krea di bestia

Awèl sí, ún ta kria galiña i e otro ta kuida chubatu



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Hefe di redakshon
Nathaly
Evertsz-Ipcendencia

Redakshon
Papi Antoin
Edson Pietersz

Partner na Aruba
Awe Mainta
Partner na Kòrsou
Extra
Partner na Boneiru
Live99

Layout
Maya Beaumont

Konsehero:
Bòl Antoin
786-6818

Aviso
avisobon@gmail.com

Página katólíko

DJADUMINGU DI RAMA, DEN PASHON DI NOS SEÑOR HESUKRISTU

Evangelio : Lukas 19, 28-40
Promé Lektura : Isaías 50, 4-7
Salmo : Salmo 22, 7-8. 16-19. 22-23
Di dos Lektura : Filipi 2, 6-11
Evangelio : Lukas 22, 14- 23, 56

Riba e djadumingu aki nos ta rebibá e esena semper konmovedor di e entrada triunfal di Kristu den e siudat di Herusalèm. Nos tin den nos man rama bendishoná i ainda ta resoná den nos oído e kanto di hubileo di e pueblo aklamando Señor. Pero nos sa ku e triunfo ei tabata mashá pasahero. E pueblo ku ta aklamá Kristu komo e Mesias, esun mandá pa Dios, denter di mashá poko dia lo pidi su morto.

E promé refleksyon ku e cambio asina rápido i ineksplikabel ta sugerí na nos, ta pa siña pa no pone tur nos konfiansa únkamente den emoshon kambiante di e kurason humano. Manera un persona ku a biba e amargura di un gran desilushon a bisa : "Mi no ke biba di ilushon, pa mi no muri di desengaño". Por ta ku ya nos a sufri un gran desengaño. Si nos tabata víktima di traishon di un hende den kua nos ta konfia demasiado, laga nos trata a lo ménos pa no kousa e mesun daño na nos semehantenan. Ser víktima no ta outorisá nos pa kombertí nos mes den hende ku ta hasi otro nan víktima.

E rama aki ku nos tin den nos man tin nifikashon mashá profundo i ta eksigí di nos un kompromiso. Nos ta bai hib'é na nos hogarnan i nos ta ward'é ku rèspèt. Algun hende ta poné den nan outo, manera señal di protekshon. Pero prinsipalmente, e rama akí mester rekordá nos henter aña, ku awe nos a hasi e kompromiso di sigui

Kristu t'e na morto, no manera e pueblo ku awe ta aklam'é i despues ta traishon'é. Si nos riba e dia aki a tene proseshon no ta simplemente pa tradishon òf pa rebibá algu ku ta pertenesé na pasado. Iglesia ta invitá nos pa aktualisá e drama di pashon, pa rebib'e den nos propio bida, pa logra un kombershon na Dios real i definitivo. E ora ei, nos no por aklamá Kristu komo e berdadero salvador únkamente ku boka òf riba un dia determiná di altura. Nos mester hasié ku kurason, ku testimonio di nos bida i riba tur dianan di altura . Hopi bia nos misa di djadumingu ta un aktividat ku no tin nada di aber ku djaluna. Ta p'esei, ta importante ku e ramanan aki ta kòrda nos kada dia ku fe no ta un trahe ku nos ta bisti riba djadumingu, sino un túnika ku mester kompañá nos semper.

Sin duda boso lo a nota, ku e karakter festivo di e liturgia ta kambia di repente ora misa kuminsá. E momento kumbre di seriedat di e seremonia di awe a ser alkansá ku e lektura di pashon i morto di Hesus. Nos no por kita for di nos e idea di ku pashon di Kristu mester ta nos tema dominante durante hinter e siman aki. Pero, nos tin ku limitá nos mes na rekordá pashon históriko di Kristu? E emoshon dilanti di sufrimentu di e Salvador ? Biba Siman Santu ta nifiká, manera e muhénan di Herusalèm, yora dilanti Kristu, ku ta pasa ku e krus riba su lomba ? Mi ta kere ku nos Siman Santu, pa ta



un berdadero selebrashon religioso, mester bai mas ayá di un simpel rekuerdo di pasado. Ta bèrdat ku Kristu a sufri manera ningun otro hende. El a muri riba un krus, ningun hende ta nenga esaki. Pero, e echo aki ta agotá hinter pashon di Señor?

Nos sa ku Kristu tabata ke a identifiká su mes ku kada ser humano. Laga nos rekordá únkamente un frase, entre hopinan: "Mi ta sigurá boso: tur loke ku boso a hasi pa un di mi rumannan di ménos importansia , boso a hasié pa Mi". Kada mucha hòmer òf mucha muhé ku nase, ta Hesus ku ta multipliká su mes riba tera den e milager renobá di Bètlehèm. Kada persona ku mester emigrá, ta Kristu ku ta regresá na Egipto pa skapa di e odio di Herodes. Kada persona ku ta ser persiguí pa su ideanan, ta Kristu ku ta bolbe sufri e atakenan di e dòktòrnan di lei i fariseonan. Kada ser humano ku ta kondená na

morto, ta Kristu skuchando di boka di Pilato e sentensia di kondena. Kada individuo ku disparsé o ku nan asesiná, ta Kristu bahando su kabes i muriendo riba krus.

Por ta nos komo kristian a kustumbrá di mira e susesonan diario, manera si nada nan lo tabatin tin di aber ku fe o manera si nan lo tabata deskonektá di e historia di salbashon. Pero no ta asina. Di ei ku nos mester reashoná kontra tur violashon di dignidat humano, pasobra ora despresiá o kita bida di un semehante, ta Kristu mes ta esun ku ta ser ataká i matá.

Nos ta bibando den un momento krítiko den istoria di humanidat. Ta parse ku a pèrdè rumbo i ku humanidat, leu di progresá, ta kana kaminda di su outo destrukshon. Nunka manera awor tabata mas dramátiko e estado di hamber, di desempleo, di guera i revolushon, di asesinato i di masakrenan

kolektivo, manera den nos dianan. Biba Siman santu awe, ta eksigí di nos pa mira tur e susesonan diario den lus di fe i mira Kristu, ku ta kondená inhustamente den tantu ruman ku ta lucha pa hustisia i pa un mundu di pas.

Finalmente, Siman santu tin ku provoká den kada un di nos un cambio radikal i definitivo den nos bida. E próksimo djadumingu nos lo ta selebrando e gran fiesta di Pasku di Resurekshon, e misterio sentral di nos fe. Pero Pasku di resurekshon nunka lo ta un realidat den nos bida, si promé nos no aseptá pa muri ku Kristu pa nos propio piká, pa egoismo, rais di tur piká, i na nos negativismo di stima, ku ta e esensia mes di piká. Laga nos kuminsá, pues, e Siman Santu aki ku e deseo sinsero pa apliká na nos tempu i na nos propio bida, e pashon, morto i resurekshon di Hesus.

STATIA/SABA/ST. MAARTEN

Konseho Insular di Statia ta eksigí rèspèt

ORANJESTAD (EUX) -- Konseho Insular di St. Eustatius a tene un konferensia di prensa djabièrnè, kaminda miembronan di konseho a reflekshoná riba un bishita resien na Hulanda. Kombersashonnan ku Sekretario di Estado Zsolt Szabó a bira zür lihé. For di prinsipio e sekretario di estado a laga sa bon kla ku e lo no papia tokante su intenshon pa alterá e leinan vigente unilateralmente ku e konsehonan insular.

Segun e konsehonan insular konhunto, e aserkamentu akí ta kontradisí e prinsipio ku kualke kambio hurídiko mester keda hasí pa medio

di konsulta signifkante, no unilateralmente.

Durante e enkuentro miembronan di Konseho Insular, Clyde van Putten, Mercedes Lopes-Spanner, Glenville Schmidt i Derrick Simmons, kada un a presentá nan perspektiva. Tur miembro di konseho a enfatisá ku akuerdonan hasí di buena fe ku eks Sekretario di Estado Alexandra van Huffelen mester keda modifiká solamente pa medio di konsulta apropiá.

“Szabó por oponé palabranan manera no-demokratiko i kolonial, pero ta eksaktamente asina el a komportá su mes,” Clyde van Putten, kende

a papia mas largu entre e miembronan di konseho, a bisa.

Un otro punto di frustrashon pa e delegashonnan, tabata e nengamentu di Szabó pa permití eksperto konstitushonal Arjan van Rijn, e konsultant pa e islanan BES, pa partisipá den e reunion. “Miéntas ku Szabó a trese no ménos ku seis konsehero, nos no por a trese ni un,” Van Putten a deklará.

E miembronan di konseho a ekspresá mas optimismo tokante nan diskushonnan ku miembronan di Parlamento i Senado Hulandes, kendenan a



parse mas reseptivo pa nan preokupashonnan ku Szabó tabata. “Un kos ta sigur, e islanan lo no bòltu i hunga morto. Nos ta bai defendé nos interesnan”, Van Putten a deklará.

Miembro di Konseho Insular Glenville Schmidt:

Falta poder di préstamo ta dañá futuro di Statia

ORANJESTAD (EUX) -- Durante un konferensia di prensa tené djabièrnè, miembronan di Konseho Insular di St. Eustatius a bosiferá nan preokupashon riba e limitashonnan poné riba outonomia i kresementu ekonómiko di

e isla.

Miembro di Konseho Insular, Glenville Schmidt, a enfatisá ku e inkapasidat di Entidat Públiko pa tuma fianza ta un opstákulo grandi pa desaroyo. “Nos komo isla no por fia,” Schmidt a deklará. “Semper

si nos ke hasi algu, nos mester roga pa fondonan di Hulanda, en bes di tin e abilidadat pa fia.”

El a señalá ku e dependensia akí ta frena progreso i ta mantené e isla den un estado di vulnerabilidadat finansiero. Tambe Schmidt a kritiká e nivel di supervishon di parti di Hulanda i spesialmente Representante di Reino. “Representante di Reino tin palabra den tur kos, manera kontratashon di ámtenarnan nobo, òf disidí riba promoshon,” el a bisa. “Nos tin ku manda tur e dokumentashon pa Boneiru. Miéntas ku tin un kuadro di tempu den kua e mester respondé i hopi biá e no ta keda hasí den e kuadro di tempu aki. Esaki ta strobando e abilidadat di e islanan pa sigui padilanti.”

E miembronan di Konseho Insular durante di

e rueda di prensa djabièrnè a trese nan opheshonnan pa ku e proseso pa revisá e leinan di WolBES i FinBES ku ta goberná e islanan. Miéntas ku Boneiru, St. Eustatius i Saba a yega na sierto akuerdo ku

èks Sekretario di Estado Alexandra van Huffelen, e aktual Sekretario di Estado Zsolt Szabó tin diferente punto di bista. E islanan awor ta akusá Szabó di un posishon anti-demokratiko i komportashon kolonial.



Detenshon pa intento di homisidio

ORANJESTAD (EUX) -- Djaluna 7 di aprel pa mas o ménos mitar di diesdos di mainta, a detené e hòmer di 37 aña di edat di inisialnan J.Q.W. na Warda di Polis na Sint Eustatius.

E hòmer ta keda

sospecha di intento di homisidio involuntario, maltrato, kandela i vandalismo. E detenshon a tuma lugá despues ku polis a risibí informe di e echonan menshoná anteriormente. E kaso ta bou di investigashon.

èxtra
...number 1
DI NOS E TA

Kòrsou ta inisiá diálogo tokante invershonnan pa desaroyo duradero

WILLEMSTAD -- Ministerio di Desaroyo Ekonómiko (MEO) a organisá e tayer di maneho 'Promoviendo Invershon pa Desaroyo Sostenibel' djaluna 7 di aprel. E tayer akí ta marka e inisio ofisial di un trayekto di konsultashon amplio dirigí riba e revishon di e maneho di invershon direkto di eksterior, FDI, di Kòrsou.

E tayer ku a tuma lugá na Renaissance Wind

Creek Curaçao Resort, a trese representantenan di instansianan gubernamental, asosiashonnan empresarial i zona ekonómiko huntu. Huntu ta traha pa yena na un klima di invershon fortifiká ku ta aliniá ku e metanan di desaroyo sostenibel, SDG's, di Kòrsou.

Den su diskurso di apertura, Vanessa Toré, Direktor di Sektor di Koperashon

Ekonómiko ku Eksterior, a enfatisá e importansia di invershonnan eksterior pa e transformashon ekonómiko di Kòrsou: "E tayer akí no ta un reunion di solamente un biá, pero e ta komienso di un trayekto nashonal. Huntu nos ta konstruí un maneho di invershon duradero ku ta posishoná Kòrsou komo un destinashon di invershon duradero i atraktivo."

Oradó prinsipal durante di e evento, tabata Paul

Wessendorp, anterior hefe di promoshon di invershon na UNCTAD i consehero internashonal riba tereno di FDI. Den su presentashon, el a trata e tendensianan mundial pa promoshon di invershon aliniá ku e metanan di desaroyo sostenibel i e importansia di strategianan dirigí pa islanan chikitu manera Kòrsou.

Durante su bishita na Kòrsou, Wessendorp a tene kombersashonnan bilateral ku diferente partner, inkluyendo Kámara di Komèrsio, CINEX, CURINDE, Curaçao Tourist Board, Ministerio di Desaroyo Ekonómiko i representantenan di organisashonnan di sektor privá. Tambe el a interkambiá ideanan ku Minister di Desaroyo

Ekonómiko, Charles Cooper, tokante e importansia di FDI pa desaroyo sostenibel i e gobernashon i efektivitat di agensianan di promoshon di invershon, IPA's.

Ademas, durante di e tayer a presentá e strategia nashonal di eksportashon, NES, di Kòrsou, ku atenshon spesial pa oportunidatnan di invershon den transishon energétiko i ekonomia blou, dos sektor ku gran potensial pa kresementu sostenibel i koperashon internashonal.

E tayer ta marka e komienso di un proseso mas amplio, kaminda di awor te òktober 2025 lo tuma lugá diskushonnan profundo ku partnernan relevante. E meta final ta pa desaroyá un roadmap nobo pa maneho di invershon pa Kòrsou.



Duana ta interseptá kargamentu grandi di bibida

WILLEMSTAD -- Duana na Kòrsou a pone beslag riba un kargamentu di bebida alkohóliko, refresko i otro produktonan di konsumo e siman ku a pasa pa kua no a paga derecho di importashon. Esaki a sosodé durante un inspeksion ekstenso di un kòntainer ku tabata destiná pa un kompania lokal.

Duaneronan a deskubrí e merkansia durante un inspeksion na un kompania

den e distrito di Brievengat. E bòternan di alkohòl tabata kuidadosamente skondí den kaha di diferente aspekto, pero tòg a keda mirá pa e funshonarionan di Duana.

Segun duana, esaki tabata un envio formal, di kua un parti no tabata inkluí riba e formulario di impuesto. Dor di esaki no a paga derecho di importashon riba e produktonan akí, ku awor a keda tumá den beslag.

E merkansia a keda transferí pa un depósito di Duana pendiente di mas investigashon. Outoridatnan ke determiná e balor total di e karga i kuantu impuesto mester paga riba e merkansia no deklará. Duana a bin ta hibando kontròlnan mas severo resientemente. Último simannan tambe a haña droga den vários kargamentu na kaminda for di Hulanda pa Kòrsou.

Kòrsou tin su Reina Kosecha

WILLEMSTAD -- Djasabra 12 di aprel a tuma lugá e elekshon di loka konosé komo Reina Seú, awor bou di e nòmber Reina Kosecha.

Reina Kosecha 2025 a resultá Narian Martina, miéntas ku e promé finalista Ishaina Girigorie i Quishantely Mingueli komo di dos finalista.



DEPORTE

Sekretario di Estado Karremans:

‘Dil di salú’ ta mehorá kuido di salú

KRALENDIJK/DEN HAAG -- Un ‘dil di salú’. Ku esaki, Sekretario di Estado Vincent Karremans di Hubentut, Prevenshon i Deporte, ke mehorá funshonamentu di kuido di salú na Karibe Hulandes.

“E kombersashonnan durante mi biahe a mostra ku tin un nesesidat grandi pa koperashon i akuerdonan

kla riba responsabilidatnan pa loke ta trata ehekushon. Un instrumento pa esaki ta konklui un ‘dil di salú’, un akuerdo ku afspraken konkreto entre e partnernan enbolbí,” segun Karremans den un karta pa Tweede Kamer. E ‘dil di salú’ ku

e sekretario di estado ta deseá, ta kontené kuater tema prinsipal, prevenshon di salubridat públiko, atraé sufisiente personal kualifiká, mehorashon di referensia médiko i koperashon amplio ku Karibe Hulandes.



Torneo di rugby islanan ABC

KRALENDIJK -- Federashon di Rugby di Boneiru a anunsiá ku ‘ABC Island Series’ ta tuma lugá djabièrñe 19 di aprel komo parti di Siman Internashonal di Deporte Boneiru.

E torneo ta primintí di bira un anochi emoshonante yená ku akshon, velosidat i rivalidat deportivo. Ekiponan manera Arawak, Mad Dogs i Lycans, lo kompetí kontra otro den

Stadion di Playa, unda ta hunga e partidonan entre 6’or di atardi pa 10’or di anochi.

‘ABC Island Series’ ta reuní e mihó talentonan di rugby di Aruba, Boneiru i Kòrsou i ta ofresé públiko di tur edat un eksperensia deportivo úniko riba e isla.

Federashon di Rugby Boneiru ta invitá un i tur pa bin i animá e hungadónan durante e evento dinámiko akí. Entrada ta grátis.



Destaho Nashonal Pa Espasio Di Almacenamentu Eksterno

Shared Service Organisatie Caribisch Nederland (SSO CN) ta buska un proveedor pa hür espasio di almasenamentu físico eksterno.

Ku e proveedor aki, SSO ke fiha sierto palabrashon pa loke ta trata e espasionan ku ke hür, seguridat i protekshon, kondishon di pago, término, preis i persona di kontakto.

E meta di e destaho aki ta pa sera un akuerdo ku un proveedor pa un tempu inisial di dos aña ku e opshon pa prolongashon di dos biaha un aña.

SSO CN ta invitá e proveedornan ku ta interesá pa partisipá na e destaho nashonal akí. Registrá **promé ku djaluna 5 di mei 2025** dor di manda un meil na aanbesteding@rijksdienstcn.com

PENSAMENTU DI SIMAN

Tur hende tin mester di un rason pa biba:
Algu di Bo Mes ku kua bo por biba kuné.....i un kreensha pakiko bo por biba.

Pakiko?!

Pasobra e versikulo aki ta bisa bon kla....

“Bendishoná ta e hende ku ta konfia den Señor i kende su konfiansa ta den Señor.”

Jeremias 17:7.

Un bon siman pa nos tur. No lubidá ku na tur momento i den tur sirkunstansha e palabra di Dios ta pas nèt nèt. Keda bendishoná.

Felis siman.

14 aprel 2025

LVV drechando molina

Henter e siman ku a pasa tim di LVV ta drechando mulina. A pone mulina di Kavula bèk den funshon. Awor ta planiando pa drecha e baki, pero ya tin awa pa kunukeronan. Tremendo aplouso pa tim di LVV.



\$675
SPECIAL PRICE

HP All In One Computer
Intel Ci5 Processor
8 GB RAM
512 GB SSD



Computer Workstation
\$275

JBL SPEAKER
WATERPROOF
\$99



APPLE IPHONES
STARTING AT

\$899

